



E podarà ancje promovi e puartâ indevant studis e ricercjis di caratar sociâl e culturâl

Il Comun di Guriza, cu la delibare di Zonte 409 dai 18 di Dicembar 2025, al à metût adun une Taule permanente pe tutele da la lenghe minoritarie furlane. Cheste Taule e je un organism partecipatîf di colegament tra la popolazion di lenghe furlane e la aministrazion comunâl e di confront sui problemis di caratar sociâl, culturâl, economic che a rivuardin la vite da la minorance linguistiche furlane e la sô libertât tal afermâsi dentri da la comunitât e su cuistions specifichis peadis a events o fats particolârs.

"Une carateristiche uniche da la nestre citât e je la grande ricjece linguistiche - al à metût in lûs in sindic Rodolfo Ziberna - e par chest e je nassude la idee di meti adun cheste Taule tant che imprest di confront".

A ân cjapât part a la presentazion ancje l'assessôr comunâl a lis minorancis linguistichis Maurizio Negro, che al à metût in lûs il caratar a tiermin lunc dal progjet, la dirigente dal setôr Antonella Manto e il president da l'Arlef, Eros Csilino.

A jerin presints ancje il vicepresidente da la Societât Filologjiche Furlane pal Gurizan, Renzo Medeossi, e il president da la consulte des associazions di Luzinîs, Gianni Bressan.

La Taule e podarà segnalâ a la aministrazion i câs li che si riten che la minorance linguistiche e vedi



A Guriza une Taule permanente pe tutele da la lenghe minoritarie furlane

Un gnûf organism di colegament e di confront tra la popolazion di lenghe furlane e la aministrazion comunâl

prejudizis o limitazions a la sô libertât di afermazion. E podarà ancje promovi e puartâ indevant studis e ricercjis su aspjets che si riferissin a la presince e al rûl da la minorance linguistiche intal contest sociâl, culturâl e economic da la citât.

La costituzion e lis voris da la Taule no varan spesis e no tocjaran in nissune maniere la ativitât da la Regjon ni dai ents regjonâi sorestants su la tutele da lis minorancis linguistichis storichis e di chê furlane in particolâr.

No tocjaran nancje la iniziative autonome e libare da lis fuarcis politichis, che a podaran simpri fâ valê intes sedis justis lis lôr posizions sui problemis da la minorance linguistiche, in mût independent di ce che e dîs la Taule.

A fasaran part dal sodalizi 11 membrs che a fevelin par furlan, nomenâts dal sindic o su indicazion dal orghin, ent o associazion che a rapresentin: doi rapresentats dal consei comunâl esperts dai problemis da lis minorancis linguistichis da la citât e, tra chescj, un proponût dai grups consiliârs di maiorance e un altri proponût dai grups consiliârs di minorance, un da l'ARLeF - Agenzie Regionâl pe Lenghe Furlane, un da l'Acif - Assemblee comunitât linguistiche furlane, un da la SFF - Societât Filologjiche Furlane, sîs dal ambient culturâl e associatîf gurizan da la comunitât linguistiche furlane.

Lis associazions di Guriza che a vuelin partecipâ o proponi a la Taule un lôr component a ân di jemplâ il model che si cjate sul sît dal Comun: <https://www.comune.gorizia.it/it/novita-265178/avvisi-265181/tavolo-permanente-tutela-lingua-friulana-319348>

Intitulât ai doi studiôs di storie e tradizions furlanis



XXIII edizion dal Premi Andreina e Luigi Ciceri

La Societât Filologjiche Furlane e à dât fûr l'avis di concors de XXIII edizion dal Premi Ciceri, che al asseigne un premi a contribûts scientifics che a rivuardin aspjets de culture e dal teritori dal Friûl e al è intitulât ai studiôs de culture tradizional dal Friûl Luigi Ciceri e Andreina Nicoloso Ciceri.

Il bant al previôt une sezion di "scrits": i lavôrs che a concorin a ân di jessi ineditis, mai premiâts in altris

concors e a ân di vê caratar scientific, no leterari, no memorialistic o di chê fate (a puedin concori par esempli saçs libars, tesis di lauree magjistrâl o di dottorât). A ân di riferîsi a aspjets e percors di valorizazion de culture e dal teritori dal Friûl tant che: storie, gjeografie, architetture rurâl, paisaç, turisim, economie pal disvilup dal teritori, musiche furlane, tradizions populârs e linguistiche furlane.

A puedin rivuardâ ancje la storie, lis ativitâts e i colaboradôrs de Societât Filologjiche Furlane, prudelade dai benemerits Andreina e Luigi Ciceri cun convinzion e cun passion.

I lavôrs a ân di jessi presentâts dentri dai 30 di Lui dal 2027: un timp larc par permeti a cui che al è interessât di partecipâ cun contribûts gnûfs e ineditis.

Chê altre sezion e je par une borse di ricercje a pro di studiôs e ricercjadôrs, ents, associazions e istituzions che a proponin, juste apont, une ricercje suntun di chescj argoments: etnografie, studi des tradizions populârs e de musiche furlane, culture materiâl.

La borse di ricercje e je di 5.000 euros sporcs. La domande e à di rivâ dentri dai 30 di Jugn dal 2026 e la ativitât di ricercje e varâ par fuarce di sierâsi dentri dal mês di Setembar 2027.

Cu la borse di ricercje si intint sburtâ no dome i ricercjadôrs ma ancje i ents e lis associazions a tacâ un percors di valorizazion dal nestri teritori sui temis dal bant cuntune ricercje sul cjamp propit daûr dal esempli di Andreina Ciceri.

Il bant par intîr e i modei par fâ domande a son a disposizion sul sît www.filologicafriulana.it. Par informazions clamâ o scrivi ae biblioteche de Societât Filologjiche Furlane (tel. 0432 501598 int. 2, biblioteca@filologicafriulana.it).

Agjende

15 di Març Assemblee dai socis da la Filologjiche

La Societât Filologjiche Furlane e clame adun i socis par domenie ai 15 di Març a lis 10.30 a matine tal salon d'onôr dal Palaç Mantica, sede di Udin in vie Manin 18.

L'ordin dal dî al sarà l'esam, la discussion e la aprovazion dai documents di Belanç 2025 e dai documents di Belanç di prevision 2026.

A ân dirit a partecipâ i socis che a son in regule cul paiament des cuotis.



7 - 11 di Avrîl Bibie par furlan, leture a Spilimberc

L'Istitût ladin "Pre Checo Placeran" e il Comun di Spilimberc, adun cun altris ents e associazions, a promovin dai 7 ai 11 di Avrîl la leture integrâl dal Vecjo Testament in marilenghe.

E sarà une leture continue, di matine fin a sere e par chest si cirin 350 letôrs.

Iscrizions dentri dai 8 di Març: <https://form.jotform.com/bibieaspilimberc2026/prenotazione>